

„Im Detail regierä“

200 Nationalröt i derä Verfassig, das isch kei Zuefau
Näbst dämm vüu Regeligä sichere s'Gmeinwohl und zwar überau

Ob verbotä, obligatorisch oder bewüuigungspflichtig
dr Staat meint's guet und zwar ufrichtig

Einzig s'überwache
das lö mer lieber d'USA lo mache

„Datum Abgloffä“

23 Jahr im Bundeshuus, sit em 91 so lang isch är scho drann
Radar, Röhre, Raser sis ewig gliichä 3-Punkte Abgasprogramm

I dere Ziit 240 Votä und 118 Vorstöss, das tönt nach vüu
Bilanz isch aber vor allem polterä und ämol äs Parlamäntsgebrüu

Genau uf d'Wahle nimmt si Wahlzug fahrt uf und das ohni Verspötig
trotzdäm s'isch wie bim „Wetten Dass“, mir hei ne jetzt gseh und nümme nötig

Dummerwiis heile die meischte Dinosaurier Mikrofonmangel mit Bundeshusfraktion
Do hüft nume eis, dr Papscht Franziskus startät ä Roland Borer Rückruefaktion

„Verteidigungschaos“

Armee im Dur-Umbruch
oder scho bim schlichändä Abbruch

Flugsicherheitslückä mit emä Holzchalet abdichtä
Kei Plan B, das si bire Bedrohig jo ganz gueti Ussichtä

Was die GSOA mit irnä Waffä nid cha eliminierä
Duet dr Ueli Murer als Bländgranatä usradierä

„Schadä im Deitiger Schachä“

Kinesiologie, Hypnosetherapie und 5-Gang Frässä
Im Schachä-Knascht wird mit ganz andere Elle gmässä

Auerdings isch d'Konzeption ir Umsetzig nid ganz glunge
D' Funktion vo Energie und Elektronik het me no nit usegfunge

Trotzdäm die 60 Chischtä Investition hei sech sowieso glohnt
statt einisch wird dr Häftling jedä daag mitämä ‚tag der offenen Türe‘ behohnt

„Bootflüchtlingsquote“

Z'Bärn rumorets uf der rächte Sitä
Für d'Wirtschaft sig das ä witeri Breitsitä

Diä Frauequotä sig ä Gruus
das isch nume grad guet für's Bundeshuus

I der Realität, das gsei me beschtens i de Meer-Flüchtlingsfähr
hei die Fraue doch überhaupt gar kei Wärt

I däm Fau müesse mer um üse Kanton nid bangä
d'Quote 6:1 im Nationalrot – das isch no grad guet gangä

„Gschlächter-Sproch-Neutralisierig“

Jetzt In isch Gschlächter-Sproch-Neutralisierig
oder uf feministich Sproch-Schadstoffreduzierig

Sött me äch das Ganze nomou überdänke
aus Maa git eim das plötzlech z'dänke

Wüu Mannschaft – Frauschaft ??
Herrschaft - Abgschafft !!!

„Hitzebeständig's Gäud“

Dr Emir isch sich sicher das stimmt für's Land
die WM 2022 entfacht bi sich deheim än Euforie-Flächebrand

Näbscht dämm isch au die Vergab sehr lukrativ
die Bilanz isch i allne Eggä und Ändi positiv

Zum Büschpüu dr Lohn vo de Bützer mues är nid hingedüre go verstecke
die meischte gheia sowieso abem Grüscht und düä verrecke

Aber im Summer isch die Wüeschti heiss
das isch für's Image ä Risäscheiss

Um dr Sunnestand z'verschiebe und dodermid d'Hitze reduziere
muess me intensiv mit em Allah kommuniziere

Für's Wätter so seit dr'Allah
hed D'FIFA bereits alli Rächt dra

Blöd jetzt cha dr Emir d'WM nüm storniere
es bibt em nume noeinisch z'Schmiere

Für die Idee am Sunnestand go z'schrüble
het em Emir si Vordänker lang müesse grüble

Keis Wunder das cha nume vomene Gränchner Ühreler cho
Dä isch dört glandet, will si ne bir IS wäge sire Härkunkft nid hei gno

„Bankerpestilenz“

UBS und CS düe üses Gäud vernichtä
Wirtschaftläch wie nes Gschwür Unfug verrichtä

Jetzt wot me ändlech dem Bänker-Virus uf d Spur cho
Wüu das jo au uf Stür-Gsundheit vo üs allnä cha schlo

Expertä warnä, die grosse Milliarde-beweger
Sigä no schädlecher als EBOLA-Erreger

„S'Selfischi Erziehig“

D'Spaze pfifes immer wider vom Dach
Mit sich sälber nackt umespile güutet als schwach

Sich der bi nackt fotografiere und das au no verschickä
do cha doch einä nümme ganz rächtig tickä

Das kümmeret d'r Geri Müller nume wenig
als obere Grüne het me bi sötigne Sache keini hemmig

Dr Geri Müller, bis spoot ir Kanzlei am schaffä
verbindet s'verschicke grad mit gschäftleche Sachä

Im gliche Momänt prüeft är im Säubschtversuech, ganz Staatsmaa
Ob für Baade dr Basler-Chindergartä-Sexkofer bewüuigt wärde cha

„Pro-miis“

Färnsehluenge macht eim chrank
Än einzige Promi-Exibizionischtä-Zank

Um jede Pris d'r Mittelpunkt regierä
Ohni Scham sofort d'Pietät verlierä

Gäscht und Talkmaster
Es einzigs Erziehigsdesaster

I as Moderator würd mi nid schiniere
Sonere Irina Beller eini z'schmiere

„Gluschtigi Sache“

Fleischkontrollä das bruchts i jedem Fall
sogar s'Zuchu, das heisst würklech überall

Wo d'Kontrollörä spot am Obe i Mc Donalds i marschiere
hei si sofort dr Färnseh afo avisiere

Ä dem FrüsCHFleisch git's nüt ussetzä
Ömu nüt wo d'Gsundheit chöi verletztä

Glöub öu, das isch nume für dene dr Haus z'verränkä
Um vo däm Zuchler Carna Grischa-Fueter abzlänkä

„Strahligsfohr“

Unterhaltig isch es hert's Gschäft
Nid jede het do der für d'Chräft

Ganz bsungers vor d'r Kamera
Entstoht mit d'r Züt bi mängem ä Paranoia

Vo bländendä Schünwärfer beschtrahlt sis ganzä Läbe lang
Isch äm Roger Schawinski si Geischt offesichtläch nümme in Iklang

Um sich sälber und sini Gescht vo sire kontraproduktivä Usstrahlig z'schütze
Het är letschthin näbscht dr Suntigszütig sini Zürcher Jodtablette afo nütze

Um sich vor wütere Beläschtigungä düre Roger z'wappnä
het d'r Thiel zur Sicherheit das uf si Sprächbox lo plapperä
„Kein Arschloch unter dieser Nummer“

„Stütfreie Biss“

Schutte isch a herti Drogä
scho mängem het si s'Hirni verbogö

Zum Bischpüu dr Höness-Bschiss, us 3 Millionä Stürhinterzug
wird über Nacht a 30 Chischtä Stürbetrug

Und de das Urteil, dä Richter isch doch vom Aff bissä
Ig hät mitem Höness dr Uru Suarez id Chischtä gschmissä

„D'r Bärg isch nöcher“

Die Achtibahnfahrt het letschtlech äs Änd
Nach fuf Johr got dä Alptraum ändläch z'änd

S'glüchä ufe und abe wie uf em Wäg dörthärä
wott ig uf der erschte Fahrt mit d'r Seilbahn nid erlabä

Was hei mer planged wider ufe z'go
Und vor allem äm Noveämber-Näbu äs Schnäppi z'schlo

Zum Glück isch dr Husbärg jetzt wieder nöch a d'Schtatt häre cho
Uf's Laufe han ig mi nid wöuä abelo

Trotz allem a schnelleri Witsicht hät me sech müesse erkämpfä
brachial die Inträsse vo Bundesamt und Heimatschutz uns em Wäg schränzä

Dür da Beamteschlamassel wär me vil schnäller dürecho
wenn mä s'Bachelor Girl Esra vo Gränche jedem eis hät uf d'Schnure lo schlo

„Wouf im SBB Peuz“

Sobald a Wouf duet Schof erblickä
Wot är sech sofort dörtdra erquickä

Üsi Gsöuschaft schreit imene söttige Fau sofort nach Vergäutig
D'Dier chöme nume no usgstopft im Museum öffentlich zur Gäutig

Chürzlech het doch au dr Schinäverkehr Schof äm Herrgott übergäh
De chönnt me doch au dr SBB-Meyer zum Abschluss freigäh